

Pitaahomi Utipiho Kapiho

Kimandi Pitaahomi Utipihandi Kapihandapi Nesipihande

Poriho komi asisiha napwitandihaapi jatata Timotehopi utipiho jipatipiya nusoasipatamatiyati ami Pitaahoaisangi utipiho kimo jipatipiyataise (1:14) Kinaungwiha 66 A.D. hura kimo utipimo jipatipiyahore. Isihiya usa ipotihura piwiha asiwa asireti piwiha isihiyai katiwunjitaui kandapi Poriho gwinyapenataati kimo utipimo jipatipiyataise nyahi piwiha asireti asiwa katiwinyasohiwaiwauni kiyaaami piwihauni nyahi windi atisaati namaitihaawo.

2 Pitaahomi Utipiho napimasataise

Pitaaho isihiyai ipihirete gaahure undisiha (1:1-2)

Autaahaatihomi isihiya daiwi bimitaatiwihira siyate undisiha (1:3-21)

Isihiya isihiya usaisi piwiha asiwa asireti katiwi katiwunjitaatiwihiya ipotihura noaipaitaui kandapi Pitaaho jihi timanati kaundisiha (2:1-22)

Awaisiho japihi napitandihuraapi siyati napitaise undati Pitaaho isihiyai piwiha kataunjisiha (3:1-16)

Isihiya Utipimandi Nusoasisawihiyai Pitaaho Asisiha Gaahuraare Undataase

1 ¹Nini Saimoni Pitaahonini ami nini komi otipipati kawitandi Jisasi Kiraisiho nanimahanati natanoasisihonine. Nini kimi konini nyahi Kiraisihopi giwunyaitihaahandi apipaahi gaahandi Autaahaatiho nanyamihi nehohipatamataiwihandi Autaahaatiho nasamihi nehohiyihyaatapi kimo utipimo nini jipatipiyataayo. Iyataati nyahi aposerihyaaninuni ami sahuni taawaati giwunyaahoto, nyami Autaahaatihotati, ami nyangi nyami maipihaiwaatihapi japihi nanyamaasihore. Iyati ami ko isihyaani nahatiyaanangi gaahati naasaipiti kati kanyisahore.

²Ami sahi Autaahaatihopuni ami Jisaasiho Awaisiho nyangi nyainjatisihopuni gwinyaapi nasesipainjitihanda kindari sangi maariho nasanyami, ami gaahandi waati kasisaihi sahi nga itatamanjiniwi bimitaatiwi nini sapi gaapisundataayo.

Autaahaatiho Nyangi Gaahaiwa Kanyisati Nanyinyataise

³Jisaasiho Autaahaatihomi watipihandisahore. Iyati ami ko Jisasi Kiraisiho Autaahaatihosi watipihandisahore. Siyati ko apipaahi watipihosi komi watipihandi kimikanda gaahapa nahataapa nyahi Kiraisihomi isihyaanangi anditinyaiwati nyatatamanitandihapa aimi nyangi nga nanyinyataise. Saiwa gaahaiwa nahatewa nanyamindimandi nyahi kometirihireti japepihiritihaawi nanyinyataise. Ami nyahi sandi saitihawi Kiraisiho Autaahaatihometirihiretapi nyangi neti nanyisati ginyunyaasihi nyahi Autaahaatihopi biyaati gwinyaawaati mmonihaayo. Iyati ko nyangi gaatati nanyamaataise koai isihya nepi autaahepumapi baiwi nga usoniwi kopi maaritohitihanduni, ami ko apipaahi gaaho weriho atipihohi bimindihanduni nyahi naitihaawo. ⁴Iyati ami Kiraisi Jisaasiho Autaahaatihomi watipihanda apipaahi gaahaiwa ami awaiwaiwa kaiwaapi nawiho numwitihomi ambipati owehandi nyangi nga neti nyatatamanitandihaiwa kanyisati nga nanyinyataise. Saiwa ko siyati kanyiwimaiwa nyangi kanyisati nanyamitandi jihura ko katirihiri kireti kanyisataise. Ko siyati saiwa kanyindimandi ami sangi neti anditisaihonihi sahi apipaahi maipihaiwa maapi yapimbatambihaiwa sangi neti nasopisatandihaiwaatihapi noaipasi nehahaati yanhimaitaatiwe. Yanhimapi ami sahi Autaahaatihometirihireti nepi ko bimirihireti bimitaatiwe.

⁵Ami sahi aimi Autaahaatihometirihireti nesihyaatisi ami sandi kandapimatonihisami Kirasihopi giwunyaahohitihandi nepi anditiwipi kimaiwa bipinjawi kaiwise. Sahi Kirasihopi giwunyaahohitihandi nepi anditiwipi gaahandi kaiwise. Aiwi ami sahi gaahandi kiyohitihandisawi. Sahi Autaahaatihopuni ami Kirasihopuni mmoniwi nepi ami sahi Kiraisihomi isihya maapi yapipataapihi bimitaatiwihireti sirete tiwi baiwi mmoniwi gwinyaahohitihandi nepi bipinjawise. ⁶Aiwi ami saiwi sahi gwinyaahohitihandisawi sami ambipati maariho jandoti maaritimbipa nepi ipihatisawi jatohitihandi nepi timaamaipi kaiwise. Aiwi ami sahi sami ambipati maariho maaritimbipai nepi ipihatisawi jatohitihandisawi sahi andititiwi bitotawaawi yaasati naanjihaiwa nehohitihandi nepi timaamaipi kaiwise. Aiwi ami sahi sami ambipati maariho yaasihaiwa andititiwi bitotawa nehohitihandisawi timaamaipi Autaahaatihomihireti nepi japepihiriwise. ⁷Aiwi ami kandami tiwatihaati sahi maariho omanjititihisami naisihya Kiraisihomihiyaapi baiwi gwinyaapi gaahati kawiji usoniwi kiyai wapa nunyawise, titihisahi sawanaatami namwinji nasohirihiretihiyai kawisohipatamataiwo. Aiwi ami Autaahaatiho isihya nahatiyai maariho numwipatamataiwi ami sangisangi naasikati kaiwi isihya nahatiyai maariho nunyawise. ⁸Aiwi ami kimaiwa gaamaiwa nini taati sangi kasatohiwimaiwa nepi

anitiwi isipi daiwi bindawaawi ami kaiwa waati pihitiwi sahi kaiwise. Aiwi ami sahi Awaisiho Jisasi Kiraisiho nyangi nyainjatisihopi sangi biyati akitinihi gisunyaatati nasesipatamataataahi kimaiwa gaamaiwa sami ambipati maarihoatihuni, ami sami piwiha dahopaatihuni noaipati watipitati ahotonihi, ami kaiwa sahi kiyaatinihi kaimi nutaapo. Sahi saiwi kaimi niyohitihandaahi ami sahi kopi otipipati nehi yatitipihati windi kamaiwi titihi akipipa noaipihati kaitaapo. ⁹Iyataati ami utaaho wo saiwa gaamaiwa nini sangi kasatohiwimaiwa kamaayati owehohi wapa kaanihi ahotimbipa nga windi monataise. Ami so utaaho wo komi ndiha niyotati asahata maawinjatinjihi biyati minjasihomatiyataise. Iyati ami ko komi maipihaiwa jihura kaiwaiwa Autaahaatiho basati nemwati neti titihi gaaho popitihomwasitihandapi Autaahaatiho nisi maipihaiwa aimi basati nenimasihoniniso, tati gimunyaati ko aimi nanipimatamasihe.

¹⁰Isi ami nisi naisihyaati nisataiwi Jisaasihopi giwunyaahohiyihyaate, sangisi Autaahaatiho aimi gaatati nasamaati ami sahi titihi komi isihyaatimatitaatiwi aimi nasamihainjihyaate. Ko sangi aimi sasihihyaatisi koai niwipinjitaatiwi gaatati nasamaasitihanduni ami titihi komihyaatimatitaatiwi nasamihainjitihanduni nepi akitinihi akitihandemapi akite tiwi sawanaatuni ami isihya usauni mmondaatiwi sahi mitaahi waati andititiwi kiretapi gaahaiwa kaiwise. Sahi saiwi gwinyaapi kaiwi isiwatawaawaahi ami sahi windi japihi nuwi maipihandi kaiwi timahiyawi ami sahi Jisasi Kiraisihopi giwunyaahohitihandi windi namaamaitaapo. ¹¹Ami sahi saiwi kimireti saiwa gaamaiwa japepahirimi nuwi ami ipotihura Autaahaatiho sangi sasatati sahi napiwi nandaapise tati maasomwaaŋi awaindi nasuwati neti waahiwa jainjapwaati jainjahonihi ami sahi Awaisiho nyangi japihi nanyamaati nyainjatisiho komi isihiyai winjaati jinjapihi jinjapihi konihi bimimbipihai naiwi nandaitaapo.

¹²Iyataati ami saiwaahi sahi aimi gwinyaapi mmoniwihyaatitihandani kandi nini bapaindi mwitipisati neti sami amitiha jainjapwaati gisunyaapi nuto, ami sahi kaiwaapi nasisoari gwinyaitaatiwo. Piwiha akaaha Jisasi Kiraisihopitaha nyahi sangi aimi katawaasasonihi sami amitiheti gisunyaatati ami sami omanjitihi neti watipitati ahondaise.

¹³Isi ami nini maapi yapimbataapihi asohonini nisi ambipatisati bimohurimura saiwa gaasiwa sahi gwinyaapi kaitaatiwi bapaindi jinjihaatemati kasatimi nutaano. Ami nini sandi sangi kasatimi nutandi nisi otipipate. Ami sandi nini apaapimaato, saiwa gaasiwaapi sangi bapiyati gisunyaatonihai kaiwaapi jinjapihemapi gwinyaitaatiwi jinjapihi kasatitaano, satataato. ¹⁴Nini niwahonisapi gwinyaati mmonataayo, windi otihimetanihi nini nisi ambipati namaito. Awaisiho Jisasi Kiraisiho nyangi nyainjaati bimisiho ningi sandati windi otihimetanihi kinyi keti

napwitaise ndati titihi aimi kandataase. ¹⁵Isi ami nini anditindi waati sangi neti anditisaiti saiwa gaamaiwaapi jinjihaatema kasatimi nutaano. Saisanihi ami sahi saiwa windi nanipimatiwi namaamapi kiyaatinihi nasisoaari kaimi nutaatiwo. Saindi kaiwa nini koninihi kasatimi nutaano ami nini napoti owetisanihuraisangi sahi nasisoaari mmoniwi kaiwi ami gisunyaatitando.

**Nyahi Kiraisihomi Nausainjitihandi Jihura
Sisihoasini Nyami Ndihaara Mmoho**

¹⁶Iyataati ami nyangi nyainjaati bimisihomi Jisasi Kiraisihopi komi watipihandi awaindihandi nausaatindihandisati napitaise sataati aimi nyahi sangi kasato. Iyataati nyahi komi watipihandi nausainjitihandapi sangi kasatohitindi nehi isihiyaami piwiha maatimaatapi taanauhiha sawanaunyaapiha kanihauhi nyahi newaati kasatihaamaayo. Owetise. Nyahi komi otipipati kawitihawawi nanyamihainjawihiyaami aposerihyaanini Autaahaatihomi watipihandi nausainjitihandi Jisasi Kiraisihomi ambipateti koai neti bopihati otiwa kaumbwaati niwusaatati noaipasihi Autaahaatihomi sisihoasini nyahi yawanaanami ndihaara mmonihohitihandapi siyahandi mmonihaayo taati titihi aimi kasatohihaare. ¹⁷Iyataati Autaahaatiho yamihapataatihapi komi yundanyiha wandiha nunyati Kiraisihoai neti niwimaati awaisihoemasihhi ami komihetapi awaindihandi otiwa kambwaati nausainjihi nyahi nyami ndihaara usonihaayo. Siyaati usohonihhi Autaahaatiho komi nausainjitihandi apipaahi gaahandaatihhi bimisihomi Jisaasihopi sandaase: “Kimbihhi kimo nisi mitimoai maariho nunyati ami kopi nini maarititihore,” tati piwaatihhi ami nyahi piwiha sa atisihayo.

¹⁸Aihi sura nyahi Jisaasihoisaiti Autaahaatihomi sisihoasini maasi bitohonihhi Autaahaatiho sapiho komi Mwaaho Jisaasihoi neti niwimaati ambipati awaipati numwihi ami komihetapi sisiha awaindihandi otiwa kambwaati nausaatataise. Aihhi Autaahaatiho komi nausainjitihandi awaindihandaatihhi yamihapataatihhi bindataati nyahi atisonihhi Jisaasihopi piwiha satati kandaase. “Kimo nisi maasihimo komiheti nisi maariho ahinotihhi nini koai maariho apipaahi nunyatihore. Aindi nini kopi nga apipaahi maarititihore,” tati katihi nyahi atisihayo.

¹⁹Aihi kimba wapa sahi gwinyaitaatiwihapa kasatitandiyo. Jihhi aimehura ipotihura wiwa noaipaitandihaiwaapi piropetihhiya Autaahaatihopi katiwi jipatipaiwi ahiyohihaapi apipaahi akitinihi akaahaare, taati nyahi mmona gwinyaahaayo. Isi ami sangisangi kiyaami piwiha nepi anitiwi isiwatawaawaahi ami sandihhi sahi gaahati kaisaihi ngaatitaise. Saiwa jihura piropetihhiya Autaahaatihomi piwiha Jisaasihopitati katiwi jipatipiyohiwaiwa sisiha ramihandi asahatinditihhi taati nausaatimi naipatamatiyahaiwaare. Kaiwa siyati sisiha ramihandi

asahatinditih taati nausaatipatamatiyati nausaatimi noti asisiha bowataati ami kambwaati bosetetapihaati nipaatihaati tihooati, ami ipiho ipitahi awaindi saasinjipatamatiyati Jisaasiho yamahapataatih namasi maapi yapimbataapihi nasonihi komi nausainjitihandi sami omanjititih maarihoatih noaipahonihuraatitando. ²⁰Iyataati ami kimandi awaindihandi sahi baiwi mmoniw gwinyaapi nasesipatitandi nini sangi kasatitandiy. Jihura isihya piropetihya Autaahaatihomi piwiha ausaapi katiwi ami jipatipiyohiwaiwaami tanyaaha utaaho wo nehi ko sawahomi watipihandi amitih gwinyaasitihanda nesipati katitandihaiwaamaahe. Owetise. ²¹Ami sandi apaapimaato. Piropetihya Autaahaatihomi piwiha ausaasiho nehi ko sawahomi amitiheti ami maarihoatih maaratih gwinyaasitihanda piwiha ausaati kandaamaase. Owetise. Ami nehi Autaahaatihomi Itipih Gaaho isihyaami gwinyaahohitihandi neti Autaahaatihomi gwinyaati maaritirihiretemwati nunjati kaundati giwunyaasihi, ami ko Itipihomi watipihanda kiya piwiha atiwi nepi katiwi ami jipatipiyawaayopo.

**Pitaaho Kiraisihomi Isihyai Isihya Jaipipa
Katiwunjohiyihyaapi Jaawo Undataase**

2 ¹Jihi aimehura Autaahaatihomi isihya Isiraherihyaami otihatih isihya usa nyahi piropetihyaanane, tiwi isihyai jaipundiwihiya noaipapi bindawaayopo. Kiyai Autaahaatih piwiha nunyati windi natamusoasihihandi kandi nehi kiya sawanaami piwihaapi isihyai saundiwi, kima Autaahaatihomi piwihe tiwi jaipitiwi ausaapi kaundopo. Isi ami wani kimuraisangi sikaiwi isihya nehi sawanaami piwiha jaipipa sangi neti nasopisasitandihapi kima Autaahaatihomi piwihe satiwi samihatih noaipapi bindawaawi katiwisasitaapo. Aiwi kiyai sahi windi maawinjasahi noatiwi samihatih nandaapi piwiha jaipipa kihaiwa kihaiwa, sahi Kiraisihopi giwunyaahohitihandi nepi nasopisasitaatiwi isihyai jaipipa katiwunjitaapo. Awaisih nahataapa jatisih kiyaapi komi ambipati nunyanati kiyai kiyaami maipihaiwaatihapi numwaasihoai ahosumwapi kopi nanipimatitaapo. Kiya siyawaawi sawana nepi keti kuraanihi nopisasiwi owematitaapo. ²Kiya saiwi keti kuraanihi nepi owematitaatiwihiyaatanihandi kandi samihatih Kiraisihomi isihya taahiyihya jaipipa katiwunjohiyihyaami kiyohiwaiwa nepi apipaahi maipihaiwa kaiwi kiyaami ambipati kihiyaisawi naminiwi daitaapo. Ami kiya saiwi kiyohitindaahi nehi maatimaatapi Kiraisihomi isihyaami ipaahambihya Kiraisihopuni ami kometirihiretapihaiwaapuni piwiha maipih katiwi sisipititaapo. ³Isiya siya isihyai piwiha jaipipa katiwunjohiyihyaapi sangi wa sandi kasatitaano. Siya isiya nawiho nehi sawanaapaahih nepi ahoaitaatiwi maariho windoti akiwisamahiyaare. Kiya saiwihiyaasi sami nawiho aipi nasaitaatiwi piwiha jaipipa sangi

jipisisahaiwa kasatiwi katiwisasitaapo. Kiya siyawaahandi kandi ami kiyai piwiha neti yawutaati tipitapaati usonati nemaitandi Autaahaatiho jihura kiyaapi piwiha katati wisasati ahaihiyaare. Ami sandi ko piwiha sa nehi ipipa etitaatitati kandaamaase. Titih kaitandi akaaha kandaase. Iyati ko kiyai neti tipitapaati usonati ami nemaitandiho Autaahaatiho utaarhandi jatimi nasati wanisangi ko konihi timetati ami jatataise kiyai ko katimbipa kawisati nemaitando.

⁴Isi ami jihi aimehura isihya usa saiwa saiwi Autaahaatihoai pohipiwiwi ami maatimaatiwisauhihiyai nehi maawinjati nemasitihandapi ko siyahore, tiwi sahi gwinyaitaatiwi nini sangi kasatitaano. Jihi aimehura komi otipipatihiya yamihapataatihapihiya usa koai maatimaatiwiwi maipihaiwa kiyauhi ko kiyai nehi maawinjati neti etaihiri apipaahi tongihiropi, sahi sisihaapi nutaatiwihyaate, undati neti yotih ami apipaahi asahatahiropi asahatindihandi wirihiri watipihiri senihandamatiyati wisasati isiwatihi napwitiwi bindawaayopo. Napwitiwi bindawaawi asisiha Autaahaatiho kiyai neti sisihaapihemaitandihuraapi jatawaayopo. ⁵Iyataati ami jihi aimehura Nuwaaho bimisuraisangi Autaahaatihoai isihya maatimaatiwiwi maipihaiwa pihitiwi kiyohiyihyai windi nehi maawinjase. Ko wipati wipipati waapihaati usepati durihiri awaindihandi neti nusoasahi kiyai neti nanati nawatisati owemase. Ahi Nuwaaho nehi naasohi Autaahaatiho maaritati gwinyaasirihiretapi titihaiwaapi piwiha ausaati isihyai kaundisihoaaisaahihi isihya nehi ikwi naasairitih wihinihirami isundipihuri yahuritahiyaisati japihi numwaasahi kiyai durihiri windi neti namainjihi ami kiya nga bimopo. ⁶Ami isihya aunahipihauri awaiwauri Sotomihandaahiyaapuni, ami Gomoraahandaahiyaapuni kiya apipaahi maipitowi nemaitaano, tati Autaahaatiho kiyai nemasitihandapi sahi aimi atiwi gwinyaapihiyaate. Iyati ko sauri aunahipi awaiwauri sisiha yamihapataatihapi neti natausaasahi tihati owemati nehi sotipati waatipatihindaise. Ko sandi siyati kaindimandi isihya ipoti ipoti yapih nahanda noaipahohiyihya ningi maatimaatiniwi nepinimasaihihiyai sawito, tati nunjitandi kiyataise. Ami ko siyahosi wiwa nyangi sanyitaiso, tiwi kiya kopi yaiwi windi maatimaatimitaatiwo. ⁷Ami Rotih titih gaaho sapihi Sotomihanda bindataise. Bindataati isihya apipaahi maipihaiwa kiyaami ambipati kihiyaisawi naminiwi kiyohiwaiwa mmonataati komi maariho apipaahi mimaipiwimatati yaawati naanawisataise. Sawimainjiho bimih Autaahaatiho koai japihi numwaasahi ko nga bindataise. ⁸So utaaho titih gaaho maariho titihitaho isihya Sotomihandaahiyaami otihatih bindataise. Bindataati kiya maipihaiwa pihitiwi kihaiwa kihaiwa kiyauhi winjataise. Iyati asisiha nahateweti kiya piwiha maipihaiwa katauhi atisataise. Iyati komi maariho titih gandaise. Siyati komi maariho titihindaati

ami isihya winihapipa nemapi maatimaatisauhi winjataati ami otapahaatuni ami apatihuni komi maariho mimaiipiwimatati yayati apipaahi yaawataise. ⁹Isi ami saiwa Awaisiho kaiwimaiwaapi nyahi gwinyaitihaahandi newaati mmondihaawe. Isihya Autaahaatihoai niwipinjawi ko maaritati gwinyaasirihireti daayohiyihyai nunjenihaiwa nusoapahonaahi kaiwaatihapi kiyai japihi numwaitaise, ami komi isihyai japihi numwaitandihira aimi mmonahoso. Iyati ami Awaisiho isihya maipihya kiyohiwaiwa aimi mmonahore. Iyati kiyaami maipihaiwaapi wihoanhandi numwitandihira daihira aimi mmonati gwinyaahosi kiyai neti isiwatimi noti komi asisihya isihyai neti tipitapaati usondandihya noaipahonihura kiyai neti piwihaapihemati tipitapaati usondaise. ¹⁰Iyati ko kiyaami usai wihoanhandi apipaahi awaindihandi kiyaami maipihaiwaapi numwaitaise. Siyaari isihya apipaahi ainjotati titihimetahaiwa kaitaatiwi kiyaami maariho ambipati windosihi isihya kihiyaisawi ambipati namininiwi kiyohiyihyaatitaise. Iyati ami kiya Awaisihomi piwiha nehahaamataiwi nemahohiyihyaatitaise.

Ami kiya noaipapi daahi apipaahi watipitiwimapi ami windi yamaiwi nehi nanihaiwi autaahinjaawi yamihapataatihapi isihya kiyai autaahi wamwaanhi apipaahi gaahya jihyaapi piwiha maipiha katiwi sisipitiwihyaare. ¹¹Iyataati ami mihaati yamihapataatihapi Autaahaatihomi otipipatihyaahi windi saiwi isihya yamihapataatihapi apipaahi gaahya sanahiyihyai Awaisihomi ndiheti piwiha maipiha kaundiwi sisipimundopo. Ami kiyaahi yapipatambi isihyai nusatipihapi watipihandi apipaahi awaindihandisawihya watipihaiwa nga kaitaatiwihiyandaahando. ¹²Ami isi kimiya jaipipa katiwunjohiyihyaahi ipataatihapi kohasipihohi suhiri maasapiho ainjhipipa isihya kapai tipi yotiwi ami tipi nandaatiwi namoyaaitimbipaamataiwihyaare. Kiya setahyaasi wapa kiya windi mmoniwi gimunyaahohipipaapi maipiha katawaatopo. Isihya kohasipihohi maasapiho ainjhipipa ipataatihapipapai timahohipatamatiyati Autaahaatiho kiyai nemaitaise. ¹³Kiya isihya usaisi maariho ambipati yaawihaiwa nunyohitihandapi ami kiya sawanaisangi yaawihaiwa naitaapo. Iyataati kiya asisihya kihetimapi otapahaati ipihohi watipihohetimaawi nandapa awaiwaiwa tihwi pihitiwi nipinjawi gwisihya taupwimapi naniwi ami kiya saiwi gwinyaapihyaare: Asisihya nahateweti otapahaati ipihoheti nandapa awaimbipa tihaati nipinja nanihawaami ami nyami ambipati gaanyimatati jipinyisonihni nyahi nga maarititihahirete, tiwi gwinyaapihyaare. Saiwi kimi kiya sahi Autaahaatihomi isihyaati ahoyaniwi nahoaiwi piwaniwi nandapa tihwi maasi nanihohipihohi napiwi nasipaapi sangisawi nandapa nanawaayopo. Kiya wihoanhi mangiraini kiyaami ambipati maariho gwinyaati maaritimbipa taawi kiyawaaheti isihya gaahyaamataiwi sangisawi sami nandapa maasi nepi naniwi sangi kiyaami kipati atihya nasamasawi

nepi nasopisasawi masihaiwa nasanyawaayopo. Aiwi kiya saiwi kiyaami ambipati maariho maaritati gwimbipa kaitaatiwi maaritiwimawaayopo. ¹⁴Kiya nahateweti asihya apipaahi maipihiyaisawi ambipati timaamaipi naminindaatiwihandapaahihi gwinyamapi kiyaami ndiha mihopi mihini gaamapi notoahaariwi japihiyaare. Kiya sapa maipihapa kaitaatiwi maaritohitihandi windi apipaahi nga timaawisaitahiyaare. Aiwi Kiya isihya usa kiyaami Jisaasihopi giwunyaahohitihandi windi watipimetahiyai atipati nunyawai maipihandi kaitaatiwihati aisi nowaayopo. Kiya isihya usaamihapaapi kiyaamihapaatitandi naitaatiwi maariho windoaitandihandi aimi mmoniwi nepihiyaare. Ami kiya saiwa maipimaiwa saiwi kiyohiwimaiwaapi wihooanjihandi nawihomatiyati kiyai yaawihandi Autaahaatiho numwitaise. ¹⁵Aiwi kiya gaahaiwa windi kamaiwi ami namamapi kiyaami maarihoaatihi apipaahi maipitamataise. Aiwi kiya Beramihomihati newaayopo, ko maipihandi kiyonihi isihya koai nawiho numwitaatiwi ko nawihopi apipaahi maaritati nawihoai maariho numwipatamataiwo. ¹⁶Dongiho isihyaamatiyati piwiha windi piwamaatahore. Siyahondaahandi kandi ami Beramihomi dongiho utaahomatiyati piwaatati Beramihoi itihundati niwisapuse Beramihoni nawiho naitandi maaritataati maipihandi kaitandaindihandi ami Autaahaatiho dongihomi maahomwaanji piwiha kata wiwisiho. Aihi so Beramihoni Autaahaatihomi piwiha atisa neti Autaahaatihopi awusaasiho nawihopi maaritamataati naharisahomatiyati maipihandi kaitotahandi namihaase.

¹⁷Iyataati isihya jaipipa katiwunjohiyihya siya waapoho mihatihya yapipataatihapi noaasiho napatamasipatamataiwihyaare. Aiwi ami kiya tiwipati asihati mwipihati mbipa itinambitihiri awaimbipa tiwihaati nemasipatamataiwihyaare. Ami kiyaapi Autaahaatiho wapihi apipaahi asahatati ndiha monihapihi etaihiropi neti titihemwati tumasihiyaare. ¹⁸Isiya siya piwiha nehi taanauhiha akipipa owaha ami naharimataha katohihaapi kiyaami ambipati naimaatiwi genaniwi tihaapaiwihyaare. Aiwi kiya maipihaiwa usihya asihya kihiyaisawi ambipati naminiwi kaitaatiwi kiyaami ambipati gwaitati windoti maaritimbipa araihopi wirihirapi naapihomataiwi isihya wani kiyaanihi maipihaiwa namasi nasohiyihiyai nunjaamaniwi japihi wirapi aisi nowaayopo. Iyauhi isihya jaipipa katiwunjohiyihiyai niwipinjai nuwi nanihaiwi ambipati maaritiwaiwai kihiyaisawi kiyawaayopo. ¹⁹Aiwi isihya jaipipa katiwunjohiyihya isihiyai saundiwi, “sahi nyangi napiwi nanyipinjawaawaahi ami sahi nehi nanihaiwi bindawaawi sami maariho ambipati gwaitati jandosipipa sahi maaritohirihireti nanihaiwi kaitaapo,” undiwi kaundawaatopo. Ami kiya sawanaahi kiyai neti nusopisasitandihaiwa maipihaiwa kiyohiwaiwaami nehi otipipatihyaimatiwi bindawaahiyaare. Ami sandi

nini apaapimaato. Nyahi yawanaani aimi mmonaahiyaane. Utaaho wo wapai nunyanamataataahi sapa kapaami ko nehi otipipatihoematataise. ²⁰Isiya siya akitinihi maapi yapipatambihapa maarihoai neti kipoti ainjotati maipimasipipai kiya nyami Awaisiho ami nyangi japihi nanyamaasiho Jisasi Kiraisihopi gwinyaapi giwunyaahohitihanda namawaayopo. Saiwi namapawihya kiya ami japihi kaiwaatihi nuwi nunyainjaihi, ami kaiwa kiyai neti anitisati mmati isiwataataahi kiya jiji nyami Awaisiho ami nyangi japihi nanyamaasihopi sangi mmoniwi giwunyaapihura, maipitohitihandi nusatipihaapi apipaahi daahi nuwi maipitiwimaitaapo. ²¹Siya isiya wuwanihura Kiraisihopi piwiha windi atihomiwi ami piwiha ka daihira titihi gaahiramatiyahaasi nepi miwatawaawi kiya goti masihonji maipititauhe. Saitihati kati ami aimi Autaahaatiho komi piwiha winihapipa isihiyai nunyati natausaasihi wuwanihura napiwi piwiha akaaha ausaapi katiwunjawaayopo. Katiwunjauhi kiya atiwi gwinyaapi daihira gaahira daiwi bindawaayopo. Bimambiwihya kiya Autaahaatihomi piwiha akaaha nepi gwinyaapi isiwatotiha namapi nanipimatiwi japihi maipihandaatihi nuwi apipaahi daahi maipitimawaayopo. Isi ami kiya saiwi kiyohitindapi ipotihura Autaahaatiho kiyai yaawihandi awaindihandi numwitaise. ²²Sandi kiya saiwi kiyohitimandi piwiha akaaha wa satati ahotirihireti kiyawaayopo. Iyataati ka piwa satise:

“Suhiri dasiha daahiwatosati japihi nepemaitati neti nainje tati ahotise. Iyati ami maasapiho sanaati saisatoya baawusauhiho ko japihi noti komi wepati ekaaripataatihi ekaaripitati wepati jaatataise,”

Ga Bimisiho 26:11

tati ahotirihiri kireti kiyawaayopo.

Apipaahi Akitinihi Awaisiho Japihi Napitaise

3 ¹Nisi naisihyaati nisatawi Kiraisihopi giwunyaahohiyihyaate, kimo utipimo kasinimo sapi nini jipatipiyataayo. Iyataati utipihohi jioaatihuni ami kimoatihapuni kimaiwaapi sahi gwinyaitaatiwi nini sangi neti gisunyaati jihaati kasatataato, ami kaapi sahi gwinyaahohitihandi titihititindo. ²Ipoti wiwa noaipaitandihaiwaapi sahi jihaati gwinyaitaatiwi nini gwinyaataayo. Saiwa ipoti noaipaitandaiwaiwaapi Autaahaatihomi piropetihiya piwiha katiwi jipatipiyohiwaiwaaro. Iyataati ami nyami Awaisiho nyangi nyami maipihaiwaatihapi japihi nanyamaasihomi winihapipaapimaawi sahi mmoniwi gwinyaitaatiwi nini sangi kasatataato. Sapa Awaisihomi piwiha winihapipa Awaisiho komi piwiha otipipati nunyati isihiyai sapi natausaasihi nesi sangisaapihi napiwi kasatauhi sahi atiwi nehohipapaapito. Sapa kapaapi sahi windi nanipimimatitaatiwi nini sangi kasatataato.

³ Ami asisiha ipotihaiweti noaipaitandihaiwaapi wani nini sangi kasatitaano. Asisiha ipotihaiweti isihiya sisipititaatiwihya noaipaitaapo. Noaipapi kiya kiyaami maariho windoti maaritimbipaahihi japepahiritaapo. Aiwi kiya satiwi sisipititaapo. ⁴ “Jihura Jisaasiho satise. Nini kimaapi yapimbatambi japihi napito, tati katisihosi ami ko maahapihe wo namaapiso. Ko windi namaapitaise. Nyami asoya aimi napomahopo. Napomihauhi ami kahapaamapipa wuwanihura Autaahaatiho kiyati ahaisuraapi nehi kapaanihi naasaimumwaanji jihatimiyati ahotimi nasati wani kimurandaise,” tiwi sisipititaapo. ⁵⁻⁶ Iyataati ami kiya usinjaawi poundihi kimandi mmoniwi nanipimatiwihyaasi saiwa katawaatopo. Jihi aimehura Autaahaatiho piwiha katihi nehi komi piwihaara yamihapatuni ami yapipatuni noipati ahondaise. Iyati ami Autaahaatiho waapoho neti koraahi yapipati kaihi waapohomi otihapihi yapipati noipati ahondaise. Iyati ami durihiri waapoho koraahi Autaahaatiho katihi durihiri nimaanati yapipati nahatepi neti nanati namaasataise. Iyati durihiri waapihaata yapipati nahandi neti namaasati ami Autaahaatiho isihiyaisuni ami kahapaamapipa nahataapaisuni tiwati nemataise. ⁷ Iyataati ami Autaahaatiho komi piwiha kimika naasaraahi yamihapatuni yapipatuni wani ahotimati windi neti namopisasati nga isiwatati jatataise, tihoaahonihi sisihaara neti tihati nasasiwati owemaitando. Iyataati ko yamihapatisuni ami yapipatisuni sandi asisiha isihiya koai atihomaawisohiyihiyai tipitapaati usonati nemataahura kawitaise.

⁸ Ami nisi naisihiyaati Kiraisihopi nisataiwi giwunyaahohiyihiyaati nini sangi apipaahi awaindihandi maariho nasanyohiyihyaate, nini kimandi windi sangi kasatitandiyohitmandapi sahi windi nanipimimatiwise. Awaisiho asisihaapi gwinyaati ami mmosirihireti siyate. Ko Awaisiho asisiha nehi naasaapi kinaungwiha 1,000 kiyataise tati ami kinaungwiha 1,000 kiyahaapi asisiha nehi naasaahihe, tati gwinyaati mmonahore. ⁹ Iyataati Awaisiho wapa kaitandi watipitapi piwiha katimbipa kaitandi ko bipi ahiyati neti mehiyataamaise, ami isihiya usa sikaiwi gwinyaahohirihireto. Owetise. Ami ko utaaho wo neti nihirinati owetitandihandapi poundataise. Aihi ko isihiya nahatiya kiyaami maipihaiwa kiyohiwaiwaatihapi japihi nepemaitiwi koenda napitaatiwi maaritataise. Siyati ko maaritati gwinyaataati namati isihiya japihi nepemaititaatiwi koenda napisaihi numwaitandi bipi jatimi notaise.

Kimati Yapimbatuni Ami Yamihapatuni Owetitaise

¹⁰ Ami Awaisiho nehi akohi ikohiya ikondaatiwi nasohipatamatiyati napitaise. Nasonihi sura asisiha seti yamihapati awaindihandi ganati tautati uutati nutati katinihini owetitaise. Iyonihini kahapaamapipa ipiho

waatiho ami kaumbwaati yamihapataatihi ahotimbipa sisihaara tihati owetitaise. Iyati ami yapipatuni ami yapipataapihi ahotimbipa nahataapa sisihaara tihati nasasiwati nasihandiwati kapaanihi noti owetitaise.

¹¹ Autaahaatiho saiwaasi siyati sireti nemaitaise. Isi ami sahi ninapitaiwi daiwi bitoaitaatiwe? Sahi Autaahaatihoai nunyaniwi ami ko maaritati gwinyaasirihireti japepihiriwi ami titihi gaahiyaati daiwise. ¹² Aiwi sireti sahi daiwi bitotawa asisiha Autaahaatiho nasati isihiyai neti tipitapaati usondandihuraapi jatawaawi, ami ka keti noaipaitandi sahi nepi detemapise. Ami asisa seti sura sisiha yamihapati tihati owemati ami yamihapataatihi ahotimbipa ipiho waatiho ami kaumbwaatisangi sisiha tihati nasasiwati nutirimati nasihandiwitaise. ¹³ Autaahaatiho saiwaasi siyati nemahonihi owendaahandi kandi nyahi Kiraisihomi isihiyaani Autaahaatiho yamihapatuni ami yapipatuni asipati ahaitandi ko watipitati piwiha katisiha kireti kiyonihi noaipaitaise, taati aimi mmona gwinyaawaati isiwatihaayo. Iyaati Autaahaatiho yamihapati, ami yapipati asipati kiyati ahiyonihi ami isihiya Kiraisihopi giwunyaahohiyihiya kataatihi nandaapi, Autaahaatiho maaritati gwinyaasirihireti japepihiriwi isihiya nahatiya nahataapipihi nehi titihi gaahaiwaahihi kaiwi bimitaatiwihati noaipaitandihandapi jatihaayo.

¹⁴ Isi nisi naisihyaati nisataiwi Kiraisihopi giwunyaahohiyihiyaati nini sangi apipaahi awaindahandi maariho nasanyohiyihiyaate, sahi Autaahaatiho isihiya yapipataapihiyai neti tipitapaati usondandihuraapi jatawaawi, sahi maipihandi kamaiwi titihi gaahiyaati ami isihiya nahatiaisawi bipi napaisaati yatihi ipatisaniwi bimaawise. Ami ko sangi jasonataati kipati atiha owetati ami isihiya wapaapi sangi ikwisitaatiwihapa owehiyaatitanihi sapi ko maarititendo. ¹⁵⁻¹⁶ Awaisiho nyahi nepemaititihaawi jatataise, ami nyahi nepemaitisaihi nyangi ko japihi nanyamaitando. Iyati isihiya maipihiyaisati ahoyati nyangi neti windi tipitapaati maanyondando. Iyataati ami nyami naisoho nyamatiyati Kiraisihopi giwunyaasiho nyahi koai maariho apipaahi awaindahandi nunyohiho Porihoai Autaahaatiho gwinyaitandihandi numwihi, sapi piwiha utipihoaatihi jipatipiyati ami komi utipihohi nahatewaatihi kimaiwa kaiwaapi piwiha naasika katati jipatipiyataise. Iyataati ami akite, Poriho piwiha katati jipatipaiwaiwaami otihatihapi piwiha wiwaami tanyaaha apipaahi naanjihaawaare, nyahi kaiwaami tanyaaha windi biyaati gimunyaito. Iyataati ami isihiya Autaahaatihomi piwiha komi piwihaami utipihoaatihi aimi jihi jipatipindiwaiwaami tanyaahaapi nesipapi katitaatiwihandapi windi mmoniwi nepi namausesipainjihi kihiri kihiri asireti nepemaihiriwi nepi katohipatamataiwi, Porihomi piwiha katati jipatipaiwaiwa wiwaami tanyaahaapi naanji isihiyai namusesipainjiwaiwa nepi kihireti nepemaihiriwi katawaatopo, ami kiya windi bapaiwi nga Kiraisihomihaiwaapi akiti biyati gimaawunyaatati

ami windi namusesipatati kiyaamiheti noti windi watipimetahiyaaso. Isi kiya saiwi saiwa kiyohiwimaiwaapi Awaisiho ipotihura kiyai neti tipitapaati usonati yaawati naanġihaiwa nunyati nemaitandihyaare.

**Pitaaho Autaahaatiho Kiraisihomi Isihiyai Iwitatamasitihandapi
Kinyi Gaahonje Gaare Undati Koai Mepi Autaahemwataise**

¹⁷Ami sahihi nisi naisihyaati nisataiwi Kiraisihopi giwunyaahohiyihyaati ami sangi nini nisi apipaahi awaindihandi maariho nasanyohiyihyaate, isihya Autaahaatihomi piwiha nepi kihiri kihireti nepemaihiriwi katohiyihiyai Autaahaatiho nemasitihandapi aimi mmoniwi gisunyaatahiyaate. Isi ami sahi sawanaati baiwi jatiniwihyaati bitosawise. Jatiniwi bitotawaawi ami sahi isihya kihiri asireti kaiwi Autaahaatihomi winihapipa nemahohiyihyaami asira wireti kiyohiwaiwaatihi kiya sangi windi asisi namaisaihi, ami sahi sami andititiwi watipitiwi Kiraisihopi giwunyaapi bitohohitihandi namapi ami timahiyawi windi nepi namosasindaatiwo. ¹⁸Isi ami sahi saiwi windi nepi namosasindaatiwi, Jisasi Kiraisiho nyami Awaisiho nyangi nyainjatati ami nyangi nyami maipihaiwaatihapi japihi nanyamaasiho nyahi gaahandi windi kamaayaati nehihandi ko gaahandi kanyisati nanyinyahore. Aihi ami sahi kopi nga mmoniwi gisunyaatahiyaate. Isi Sahi sandi kopi mmoniwi gisunyainjitindi nepi awaindemapi, ami nehihandi gaahandi sangi kasindindapi mwitipisawi mmoniwi nepi watipitiwi kopi gwinyaapise. Sandi sahi Kiraisihopi mmoniwi gisunyaatindindi awaindemapi kiyaaatinihi kaimi nuwise manyinya nandapa nasisoari naniwi gwinyanimi niyohipatamataiwo. Iyataati ami ko Awaisiho ambipati awaipatisahosi nyahi wanuni ami jinjapihi jinjapihi koai mepi autaahewaumwaitihaawo. Akite. Nini Pitaahonini utipihho kimo jipatipiyataayo.